

落雨天才有的幸福

◆黃慧雯

這幾工，受著鋒面影響，幾若個月無雨水的臺灣總算落雨矣，而且一落就是一禮拜。及時的雨水毋但予大自然的花草重閣發穎，閣予枵飢失頓的水庫，做一氣食甲飽-inn-inn。政府一解除限水，洗頭毛店、洗車行恰大細間餐廳總算會當笑微微，免閣煩惱無水的問題矣！充足的雨水毋但趕走洩旱焦phi-phi的艱苦日子，閣予我想起囡仔時代雨天才有的幸福。

阮細漢的時陣，號做「五跤仔」的阿爸，常在蹠厝蹠袂牢，不時佇外口拋拋浪。伊凡勢去廟裡恰人行棋，凡勢揣朋友泡茶講政治，嘛常在騎機車去斗六的股市恰人攬，向望手頭彼幾張股票會當替伊趁大錢。毋過，若拄著落雨天，伊就會乖乖仔蹠厝，替阿母鬥顧囡仔，予阿母會當規心車衫仔趁錢。

無去四界摸飛的阿爸，會招阮耍撚骰仔。這個遊戲需要一張白紙、一个碗公、一粒骰仔恰一寡仔銀角仔。白紙頂懸畫六个平大的格仔，格仔內寫數字一到六。阮愛先共銀角仔囡佇數字抑是數字之間的線，了後等阿爸撚骰仔。骰仔佇碗公內底蕘圓箍仔，停落



來了後，向天彼面的數字若恰阮臆的相全，阿爸就會賠阮錢；反倒轉，阮若臆無著，錢就愛予阿爸咬咬去。錢哲線，賠一半，錢哲格仔，賠一倍。我較無膽，總是哲線，小弟較大心肝，攏共錢哲數字，尾仔往往是連本帶利輸輸去。

落雨天毋但有阿爸陪阮耍，閣有阿母煮的好料理——麵粉糊通啖糝。惜团的阿母，驚囡仔落雨天無通出去，會喝無聊，總是撥工走去灶較變（pinn）一寡仔麵粉糊予阮窒喙空。麵粉糊的內容千變萬化，茄仔、芋仔、番薯、葱仔，甚至是過年時仔食無了的甜粿，攏會當提來用，橫直厝裡有啥物就糊啥物。有一擺，阿母揣無物件通好糊，臨時變竅，去共牆圍仔頂遐的黃錦錦的菜瓜花挽落來搵麵粉糊予阮食。彼種酥酥脆脆閣甘甜仔甘甜的滋味，到今我猶會記得。

感謝阿爸恰阿母的用心，予阮囡仔時代的落雨天，充滿美麗的回憶。